

Kolosi

1 ¹⁻²Ɔjai Pol, Anut sen Ɔjai ipilianag go, Jesus Kristus san aposel Ɔjilasa ya. Ɔjai aƆ, Anut anen tamolpein a Kolosi na amado dan, sam na girek en Ɔjigane ipalu da. Id teid Timoti iƆ Ɔjai da girek en migire da. AƆ Kristus da atumanig lo gun alasa ya. Agod gamu Kristus mi awan ari apanig amado da. Ɔjai igo Ɔjugudani dak, Anut idaned Tamad san ilo panek, agod ilo maror dam, aƆsam na ilasa dop yen a.

Madok uyan an lo Anut ilo uyan tupani wa

³Saen fidian maƆ Anut idsad Tubun ak Jesus Kristus san Taman mugudani dan, gadiƆ an lo aƆ niƆemi wo musumiani da, agod ilo uyan ru mupani da. ⁴Man dugo, maƆ gubak mi ru en malonƆ a, aƆ Jesus Kristus o ilom rumok da, agod iƆanen tamolpein fidian ilom apidinai da. ⁵AƆanem ilo rumok san naon, Anut ikibine la ya, agog kumaen panu lo iganeg yen da. AƆ naon an aƆane wo mala nouk amado da. Mala nouk an lo, aƆ tinim ilon lo aƆanem ilo rumok, agod tamolpein fidian niƆedi wo amat san kagin dilasag tubun a. Gubak mi ru rumok ak aƆsam na ipalug alonƆ a. Ru rumok en man bilaluƆ uyan ak a Anut san tamolpein dufulale da. BilaluƆ uyan an lo, ru mel uyan uyan ak a aƆ o kumaen panu lo yen dan niƆen o alonƆ a. ⁶Tan fidian lo bilaluƆ uyan en iganeg nuƆon ifu da, agod ru en ifufurak go panu panu lo yau da. Nek ago mi, aƆ luluƆam lo kagin naon kisaek an mi yen da, saen imug mi aƆ ru an alonƆ go, Anut san ilo panek an alonƆ fufeig ipalug gamu en, ru an ifufurak go tamolpein wei mi sad na yau dugo nuƆon ifu da. ⁷Epafras ru an alonƆ uyanan san maƆau ipiteƆanaƆ a. IƆ man maƆsama urat kisaek, agod iƆ niƆen o tubun mi mamat da. IƆ maƆ naoma iƆaneg Kristus san urat kagin ipani uyanan da. ⁸IƆsen aƆ, Awan Urgan bubem yabisa dugo, lo tamolpein aenta niƆedi wo amat dan, ibol go malonƆ a.

⁹Fun an niƆen o, saen maƆ ru aƆ niƆemi wo malonƆ go ipalug gamu en, maƆ aƆ niƆemi wo Anut mugudani panaƆ da. MaƆsama gadiƆ lo Anut musumiani panaƆ dak igo ya. AƆ Anut ilon dugo ibol dan alonƆ fufei wa, agod Awan Urgan lo, aƆ kankan milaen ak, agod maƆau dam aƆ fidian tinim iƆanefute wa. ¹⁰IƆ aƆ ibinawaƆ pe, kagin uyan ak lo ator amado

wa, an lo dop tamolpein aņanem kagin dile dop igo dubol, “tamolpein an iņaned Tubun ak san tamolpein dilasa san idaisuda mok a.” Taida mi, dal fidian lo, Anut san ilo uyan aņ o tubun mi yen o, urat wagai agane wa. Urat uyan ak fidian lo nuņon agane wa, agod nal fidian aņanem maņau Anut niņen o yan isap tubun a. ¹¹ Anut san dabai tubun geig a, an niņen o maņ dam, iņ mugudani dop iņsan dabai tubun an fidian ipanaņ a, ago dop, an lo aņ dabai mok a. An lo dop muruan dugo yak fidian aņ lo dilasa bo man, aņ atur dabai pe, yaes ta ifunaņ na wa, agod yousai amam da, ilo uyan ru idaned Tamad apani wa. ¹² Iņ aņ idaisuda mi ipanaņ an lo man, aņ dam naon a iņanen tamolpein gun ak murnap diņane wan lo atutou wa. Naon an gamu iņanen kagin panek aben lilaman anda yak, ante yen da. Agod iņanen patu pasek aņane yan lo, naon an aņane san aņ idaisuda mok a. ¹³ Man dugo, id gubak mi aben a Satan tidom tubun ak lo tamolpein a Anut san tia yak itirnai dan te tumado se ya. Ak man id Tamad patud ipasig iņiliag go taug Nanun a niņen o imat dan, iņanen kagin panek aben lo tiladu ya. ¹⁴ Nanun an lo idad iņiliad go, idsad aupasek fidian isuas panad a.

Kristus iņ Anut anen tutuņaneņ tamol mok a

¹⁵ Anut Nanun man Anut a id malad nam tile san tia yan san mitilaen imado da, iņanen mitilaen nuņon mok a. Iņ Anut anen nanun matu, agod mel fidian a Anut idiri an taman imado da. ¹⁶ Man dugo, Nanun banin log Anut mel fidian idirig dilasag dien da. Mel a kumaen panu lo yen dan, tan na dam yen dan, mel a malad nam teil san, agod mel a malad nam tile san tia yan dam fidian idiri a. Mel a malad nam tile san tia man, eņel adi, tubud adi, tan keit tuon adi, agod ur naon funfun dabai amad da ya. Awo, rumok, Anut iņ Nanun banin lo mel fidian idiri a, agod iņ niņen o mel an idiri a. ¹⁷ Mel fidian gamugo dilasa dugo, iņ imug mi imado ya. Iņ lo mel fidian iņaned abek abek atem dumado dugo, nug lo dututou da. ¹⁸ Iņ mi midaeņ gurman, agod midaeņ man iņsan tinin. Iņ mi mel fidian Anut idiraig dilasa yan sad malan te ya, iņ imug mi mateņ lo kumaen imasa ya, an lo man iņ mel fidian iriņanai geig go, lak na isuda yaug imasi a. An lo gamu iņ mi mel fidian sad malan te ya. ¹⁹ Man dugo, Anut sen iņanen bunun an fidian, Nanun aman da wo ilon yen a. ²⁰ Nanun lo mi Anut mel a tan na dumado dan, agod a kumaen panu lo yan dam, fidian iņiliap iņanen muroun muroun igo woņ siņiren na dumul pe dupalu wa. An fidian iņsan ager oņ ago mi dumado san tia ya, man dugo, iņanen Nanun san dar aigim fo iwatik an lo maror iganeņ ilasa ya.

²¹ Aņ imug Anut lo siai aganeņ ator se ya, aņ tamol asau ak igo woņ, Anut malan patun fo amado ator se ya. Aņanem kankan lo man, Anut san ager amado se ya, man dugo, aņanem kagin naok naok a agane se yan saian geig a. ²² Ak man Kristus tinin tan en san an imat a. An lo gamu

Anut aŋ naom yabig iŋsan turan mok alasa ya. An lo dop iŋ iŋilian pe iŋ naon na igunaŋ dop, aŋ iŋ malan lo gun ak, nun amam tia yak, agod talpein kot ipanaŋ san tia yak, ago atur a. ²³Ak man aŋ kulob ago ilasa wo urat amam da ya. Aŋ aŋanem ilo rumok abituanip yau a. Nek ibol kadaŋ duguni dabai go ibuk ila iso san tia yak igo atur dabai a. Agod tamol ta aŋ naom yabip, aŋanem mala nouk a bilaluŋ uyan ak igane ilasa dan, ante asuk amul amoi. Bilaluŋ uyan en gubak mi alonŋ dugo, ru nek emaiak Anut san urat tamol adi aben fidian lo dubol ilasa se ya. Agod ŋai Pol, bilaluŋ uyan emaiak san urat tamol ŋilasag ŋumado da.

Urat a Pol Kristus san midaeŋ niŋedi wo igane se ya

²⁴Ŋai madai, agod muruan a aŋ niŋemi wo ŋisini se yan niŋen o uyag isusa da, agod ŋai tinig madai dupani dan lo, Kristus tinin madai dupani amaiak san wadan ŋigane itout a. Kristus tinin man iŋanen midaeŋ, agod midaeŋ an ŋibinawai wo, ilo uyan lo muruan an fidian ŋisini da. ²⁵Anut ŋai ipilianag go, iŋanen midaeŋ en san urat tamol ŋilasa ya. Ŋaisag urat man, Anut san ru an fidian aŋ ŋurupaiaŋ pe alonŋ a, ru ta kisaek ŋabituanip san tia ya. ²⁶Idsad tubud baged gamugo dilasa dugo, Anut ru en imianig saen milaen mok imianuk an yen na ya. Ak man gamu Anut ru en iŋanen tamolpein gun ak kuai tem irupidaig dulonŋ a. ²⁷Ru mianuk en girager andag awan isa. Agod Anut ilon yen ak igo, ru mianuk en kuai ipanig iŋanen tamolpein gun ak banid lo igane ya, an lo tamolpein tan fidian lo dumado dan, dulonŋ uyan dop, ru en san girager tubun ak ka dile wa. Ru mianuk girager anda yak man nek en: Kristus aŋ tinim ilon lo imado da. Agod kulob an nuŋon man, murnap aŋ kumaen a girager anda yan aŋane wa. An aŋ o ilasa wak niŋen o mala nouk amado da.

²⁸Maŋ ru Kristus niŋen o yan tamolpein murupidai dulonŋ da. Maŋ tamolpein fidian ru kagin murupidai dugo, kankan milaen ak lo maŋau mupiteŋanai da. Maŋ iloma man, tamolpein fidian miŋiliaip, dida Anut naon na maup, itaot adi Kristus lo yak igo mugunaip dutur a. ²⁹Ŋai mel an ilasa san niŋen o urat wagai ŋigane da. Dabai tubun geig ak a Kristus ŋai ilog lo igane ilasa dugo, ilog lo urat tubun mi isini dan, an nuŋon igane wo maeg ŋigane da.

Pol ilon man midaeŋ Kristus dulonŋ uyanan mok a

2 ¹Ŋai aŋ niŋemi wo, tamolpein a taun Laodosia na dumado dan dam niŋedi wo, agod a fidian naog ta dile na yan dam niŋedi wo, ŋubunawaŋ o maeg ŋigane dan, alonŋ uyanan ak ago ilog ibol da. ²Ŋai ilog man, ŋai aŋ iŋ dida ilom ŋabisap, ilom dabai amam da amado wa, agod ilo panek lo atumanip kisaek a. Ago dop an lo aŋ iŋ dida maŋau milaen mok an ilom lo ilasap yen a. An lo dop Anut san ru mianuk an alonŋ pasik a. Ru mianuk a talonŋ san uyanan man Kristus iŋsen. ³Iŋ tinin

ilon lo, Anut gubak mi mel fidian naod lak na geig ak manjau san, agod kankan milaeen ak san dam, imianaig dimianuk go dien da. ⁴Ijai ru ago jurupaianj dan lo, talpein ta ilo njane ru nam irawanj san tia ya. ⁵Man dugo, gidad anj lulunjam lo njai naog tia ya, ago bo man njaineg ur lo mi njai anj da tumado da. Ago dugo anjanem ilo rumok Kristus lo yan, anj nug aganuri dugo atur dabai da, an njai njile dugo ilog bulbal da.

**Id Kristus tiganuri dan lo id afon kubiaen
san urat tamol tilasa san tia ya**

⁶Fun an njinen o, anj Jesus Kristus anjaneg anjanem Tubun ak ilasa yan njinen o, inj aganurip sisem ator a. ⁷Anj aganep anjanem dabim Kristus lo dudu diau geig a. Agod nek ibol ab ta diabig dabai anda itur dak ago wonj, anj dam Kristus lo dabai amam da atur a. Nek ibol imug Epafiras ipitenjananj ak ago, anjanem ilo rumok an dabai apani wa. Taida mi, anj Anut ilo uyan ru apani san kagin an ilom lo awan isa wa.

⁸Kagin agane, kabelan talpein ta tamol sad manjau lo injinenj, ago dop ru bulbal injinenj dan lo, ilom injane dop ru sewak an san subanek tamol alasa banau. Talpein kulob ago digane dan, inj tubud baged sad na kagin dugo dijane yan, agod tan en san tan tubud adi sad kagin digam an diri na ya. Ilo sou naok ago yan Kristus san tia ya.

⁹Man dugo, Anut san bunun fidian an Kristus tinin injanefute ya.

¹⁰Agod injanen kumaen anj anjaneg, anj ilom injanefute ya. Kristus mi malan te ya, inj mi mel fidian sad gurman imado da, agod tubud sewak adi a tamolpein sad madok ditirni dan irijanai geig a. ¹¹Nek ibol Juda adi tinid sujulon tutek san muluj lo dudu dak igo wonj, anj Kristus da atumanig kisaek alasa yan lo, anjanem bunum wagam ak aupasek san an atuteg abibol yau a. Tinik sujulon tutek naok emaiak tamol banid nam ta digane na ya, tia, kulob an Kristus tuon lo mi ilasa da. ¹²Saen anj Kris lo suguek anjane yan, anj Kristus da sisem amat go tan lo disirianj a. Agog Anut anj Kristus da sisem ibiansag fon kumaem amasag amado da. An anj Anut san dabai urat isini dan njinen ilom rumok an lo ago ilasa ya, man dugo, Anut Kristus matenj lo yabisag inj fon kumaen imasa da yan alonj la ya.

¹³Gubak mi anj gob mi a, anj aupasek kagin lo ator dugo, Juda sad muluj lo adu man tia ya. An njinen o anj njutumi imat ak igo amado ator se ya. Ak man saen Anut Kristus kumaen foun ak ipani man, kumaen foun ak ipananj go an lo anjanem njutumi dam kumaen dilasa ya. Agod idaned aupasek fidian isuas yau a. ¹⁴Gubak mi Moses san kubiaen an, ager igane panad go ibiad tadu se ya. Kubiaen an san ru kagin wei mi a, inj nek ibol pepa roun ta an fufo gubun fidian a tinid lo dien dan digire yak igo wonj a, agod id gubun an fidian tukubune wo ta idaisuda na ya. Ak man Kristus gubun an fidian itute ya, inj pepa roun an injaneg isini

yaug, iñsan aigim fo ibali a. ¹⁵Iñanen materñ aigim fo yan lo, tubud adi tuon anda yak, agod ur saiak fidian a tamolpein ditirnai dan, iñaned dabai igane itout a. Nek ibol yu gurman ta yu igane itout go, iñsan ager ta dumat na yan banid ifoug, iñ patun fo malak malak iraug diau dak igo woñ, Kristus iñsan materñ lo yu iganeg itout go, mel fidian a dabai ad da yan ibiai dudu go, malak malak miai ipidinai a.

¹⁶Fun an niñen o talpein ta añ kulob igo yak agane wo ibol da: añ mel dugo ani aluk dan, soubul agane dan, kalam foun ilasa yak san mugurun agane dan, tia, Sabat nal niñen o yaes abal dan, ago ibol tap, añ awan ta abi na wa. Talpein ta melmel naok an niñedi wo añ bitinaek lo idiran dop, añ amoi a. ¹⁷Kagin naok ago yak man, melmel rumok a murnap dupalu an sad mitilaedi mi a, ak man mel a rumok an igo yen la ya, an Kristus sen. ¹⁸Talpein enti sewak kagin lo sen yabi idu dugo, eñel adi sad ubou leil igane dan niñen o kagin agane wa. Talpein naok an patum apani wa, kabelan añanem naon uyanan an iriñanñ banau. Iñ njoñamin lo mañau senamo geig ak iñane dak ago ibol da, an niñen o sen ipitiani da. Iñ añ naom iguri wo ru dabai anda ru kagin irupaianñ da, ak man niñenñ an fun an tia ya. Man dugo, iñsan se pitianoñ kagin an lo mi niñenñ da, agod iñanen kankan an tan en san tamolpein dugo ilod isou dak ago mi iri da. ¹⁹Talpein naok ago yan idaned gurman Kristus an yabipitili a. An niñen o iñ Kristus tinin ibiseig yaug patun fo ilasa ya. Kristus mi iñsinanen tinin san gurman, agod tinin anen boi an fidian itirnai da. Iñ lo, tinin san im, tinin san boi aenta fidian disatuañ aig nug diabi dan lo italbusi da, ago dop Anut ilon yen dak ago mi tinin fidian isap dabai a.

²⁰Añ Kristus da sisem amat a, an lo man añ ka tan en san tubud kititik abisawaip kawan ator a. Fun an niñen o, ata wo añ tan en san tamol amado dak oñ, sem idiranñ go tan en san tamol kagin wei mok an paed na amado dak i? ²¹Tamol kagin an igo dubol, “Añ mel an ta abi na wa.” Tia dubol, “Añ anañ an ta ani ale na wa.” Tia dubol, “Añ mel en ta asupuri na wa.” ²²Melmel e niñedi wo nabol den, ata mel tani taluk o boi, an id ka saen kisaek mi urat tipidinai wa, ago gup dideg diau a. Mel geg niganag an nuñon an tia ya, man dugo, ru kagin naok ago yak san fun mok man, ru kagin sensen ak agod piteñanek funfun a tan en san tamol mi durupaiaid se ya. ²³Rumok, ru kagin naok ago yan tamolpein aenta sad leil lo kankan milaen ak anda yak manonñ a. Man dugo, ru kagin an diri dupani dan lo kagin naok igo dilasa da: iñ ubou leil digane wo sed isodudunai da, iñ sed ibiai dudu da, (ak man kagin an sewak a,) agod iñsed tinid dufu da. Ak man kagin naok naok ago yan iñaned tini masai diabituanñ san iñ dabai ad tia ya.

Idsad madok gun ak san kagin

3 ¹Añ Kristus da sisem Anut ibiañsa ya. An niñen o añ añanem mala nouk an melmel a lak na dien dan fo agane wa. Aben an ate Kristus

inʒ Anut banin won ak lo imado da. ²Nal fidian pe aʒ tan en san melmel an mi niʒedi wo ilo sou ta agane na wa, tia, kumaen panu san melmel amaiak mi ilo sou an agane wa. ³Man dugo, oʒ umat la ya, agod gamu oʒane madok mok ak imianuk Kristus da dumado da, agod oʒ an ule san tia ya, man dugo, Anut mi kagin an igane da. ⁴Kristus inʒen mi man oʒane madok mok a. Amaiak niʒen o saen inʒ fon tan na walal isi dan, oʒ dam inʒ da sisem girager amam da walal asi wa.

⁵An niʒen o tan en san kulob saian saian agane dan asare. Aʒ jeit kagin ta agane na wak, ilo isou saian saian dam ta agane na wa. Aʒ pein niʒedi wo malam ta isi na wak, aʒ ilom tinim imasap ilo sou saian saian ta agane na wa. Agod ilo sek kagin ta gane na wa, man dugo, Anut malan lo kagin an man nek ibol aʒ tubud sewak adi ubou ad ale dak igo woʒ a. ⁶Tamolpein kagin naok naok ago yan digane dan lo man, Anut san tiʒae mumarek ipalu da. ⁷Gubak mi aʒ dam, kagin naok naok ago yan lo ator dugo, ilo sou sisaiak aʒanem ulum yabi se ya. ⁸Ak man kagin naok igo yak patum apani: wagai kagin, tiʒae saiak kagin, nug ule saian san kagin, agod uf ru. Aʒ ru nun ak awam lo ta ilasa na wa. ⁹Aʒ nug ta arawi na wa, man dugo, aʒ aʒanem bunum wagam ak, agod kagin a bunum wagam ak igane se yan fidian apasi la ya, ¹⁰agod aʒanem bunum foun ak aʒane ya. Anut gamu urat igane dan lo ilom ibileksap maʒau foun ak aʒane da. An lo Enti a aʒ foun idiraʒ alasa yan, aʒ lo igo igane da, nek ibol inʒen imado dak, aʒ dam ago mi alasa da. ¹¹Fun an lo na id foud tilasa yan lulunad lo tarpalek man tia ya. Grik inʒ Juda dadi, tamol a tinid suʒulon dutute yan, a tinid suʒulon ta dutute na yan, tamol asau ak, tia, tamol kasik yu gidigheid digane dak, tamol urat bigabeg ak, tia, tamol kawan imado dan, an fidian kisaek a. Gamu Kristus mi malan te ya, man dugo, inʒ tamol naok an fidian ilod lo imado da.

¹²Fun an niʒen o, aʒ gamu Anut anen pilianek tamolpein a, aʒ gun amado dugo inʒ niʒemi wo tubun mi imat da. An niʒen o nek ibol tamol ta kulos inʒal go tinin fo idiri dak igo woʒ, kagin en aburoup kulos oʒ nam tinim abuluwi wa: ilo muʒanek, ilo panek, sem ibiaʒ adu san kagin, mos kagin, agod muruan asini san kagin. ¹³Nug ale saian amoi dop, muruan dugo yak aʒ nugnug lo yen dan, aʒ anen anen apare idu dop, nek ibol Tubun en aʒanem aupasek isuas panaʒ ak igo woʒ, aʒ dam nug san aupasek asuas a. ¹⁴Agod kagin a kagin aenta fidian iriʒanai dan man, aʒ nug niʒen o amat a, nek an mi a. Nek ibol let ta, aʒsam kulos aenta ibiai sakar dak igo woʒ, nug niʒen o amat ak san kagin an, inʒ kagin aenta fidian ifou dop an lo sisem urat disini uyanan a.

¹⁵Kristus san maror an aʒ ulum am yabi wa, ago dop aʒ pilianek agane wo uyan a. Man dugo, Anut aʒ igiaʒ go tinik kisaek mi ak alasa ya, an niʒen o Anut aʒ fidian maror lo amado wo irupaiaʒ a. ¹⁶Ru a Kristus niʒen o alonʒ an aʒanep bubem ilon lo aganep idaisuda wa. Aʒ bubem

lo ru an urat isini wa. Kankan milaeen ak nam nug apiterjani dop nug ru kagin arupei wa. Isrel kanam bar an abi, kanam bar aenta dam abi, Awan Urgun bar ikubiai panaŋ an dam abi; ilom bubem tinim fidian lo Anut niŋen bar abi wa. Aŋ ago agane dop Anut ilo uyan apani wa. ¹⁷Aŋ ru dugo abol dan, kagin dugo agane dan dam, an fidian Tubun en Jesus yaŋan lo mi agane wa. Iŋ yaŋan lo mi Bai Anut ilo uyan ru arupei.

Nug muroun sad ru kagin sensen ak

¹⁸Pein, aŋanem tamol awad paen na amado wa, man dugo, kagin an mi Anut malan lo itaot a. ¹⁹Tamol, aŋanem pein niŋedi wo amat a, agod ru saian nam ta apidai na wa. ²⁰Nanuk, aŋanem tinam tamam mel dugo agane wo dubol tap, iŋ awad kagin apani. Man dugo, kagin naok ago yaŋ, agane dop lo Anut ilo uyan apani wa. ²¹Tinan taman, aŋ nanuk pempem muruan ta apidinai na wa, kabelan iŋ ilod saian panaŋ pe, kagin uyan ak digane wan dumoi banau. ²²Urat bigabeg adi, aŋanem tamam a kagin dupanaŋ dan, mel ta dugo agane wo dubol tap, aŋ pempem awad ari apani wa. Iŋ diliaŋ o, tia, iŋ ilod aŋanep dipitianaŋ o ago agane amoi. Tia, iŋ malad patun fo bo man, Anut o mi arer dop, tamol nuŋom ago woŋ, iŋsad urat itaot aganep ilasa wa. ²³Aŋ mel dugo agane dan, ilom ŋutum nuŋon amam da agane wa. Man dugo, aŋ tamol sad urat ta agane na da, tia, aŋ Tubun en san urat agane da. ²⁴Fun an niŋen o, aŋ mel en aloŋ uyan ak, Tubun en aŋ dam mel uyanan a Anut san tamolpein ipidinai o iganeg yen dan, aŋanem urat naon igo woŋ ipanaŋ a. Tamol nek a iŋsan urat agane dan man Tubun ak Kristus iŋsen mi. ²⁵Aloŋ uyan ak, talpein enti igane saian dan, iŋsinan kagin saian an naon ka iŋane wa. Gidad oŋ urat bigabeg, oŋ urat bigabeg taman, naon panek kagin a Anut igane dan kisaek a, man dugo, iŋsan leil lo man, id fidian tou kisaek mi a.

4 ¹Oŋ urat bigabeg taman, aŋ kagin itaot ak lo, agod kagin uyan ak lo dam, aŋanem urat bigabeg adi kagin apidinai a. Man dugo, aŋ aloŋ ak, aŋ dam tamam am da ya, iŋ kumaen panu na imado da.

Ru kagin aenta

²Aŋ saen pempem Anut agudani dop amado wa. Saen agudani dan, ilo sou agane uyan gup, Anut asumiani, agod pempem Anut ilo uyan apani wa. ³Agod saen aŋ Anut agudani dop, maŋ o dam ilom isou panama wa. Anut asumiani dop, iŋanen ru mianuk Kristus niŋen o yaŋ mabol ilasa san iŋ ka dalawan ipasi panama wa. Ŋai gubak mi ru mianuk an tamolpein ŋufulale pidinai se ya. Fun an niŋen o ŋai duŋubanag go sein nam ŋieg banig dufoug subanek ab lo ŋumado da. ⁴Anut asumiani dop ŋai ibinawag pe iŋanen ru en fun kuai tem ŋabol ilasap, tamolpein dulon uyan a. Ago ŋigane dop man uyan a. ⁵Saen aŋ tamolpein ensauta a aŋsam midaeŋ patun fo dumado dan

lulujad lo amado man, an ilo sou uyan ak mi ari apani dop, kagin itaot ak mi agane wa. Taida mi, Anut dal ta ikubiai ale dop, talpein aenta ananem ilo rumok ka afulale pidinai dop man, ananem ilo rumok afulale pidinai a. ⁶Saen fidian an ilo uyan san ru, agod ru kududod bulbal san an mi aninjen a. Ago dop lo talpein ta sumiaek igane tap, an ilo sou uyan ak lo mi sumiaek awan abi dop, lo tamolpein fidian dulong uyanan a.

Pol turan muroun ilo uyan ru digane ipalu ya

⁷Tikikas in nai kulob dugo ngigane na yan ka ibol alon a. In man teima Kristus lo yan ninen o mamat da, Tubun en san urat lo in naisag urat kisaek, agod man ka in Tubun en san urat igane uyanan o tinima migane pani wa. ⁸Nai in ansam na ngigane yau da. An fun man, in man dugo mumado den san fun fidian ibol alon a, ago dop an ilom pasai ibol a. ⁹Onesimus in da ansam na sisem diau da. In tamol Kris ak ilasa ya, agod man ninen o tubun mi mamat da. Gamu in dam ananem midaen san tamol kisaek a. In urarum mel fidian etna ilasa dan ka dubol alon a.

¹⁰Aristakas, in dam subanek ab lo da mumado yan ansam na ilo uyan ru igane ipalu da. Mak dam an ilo uyan ru irupaijan da, in Barnabas nukol. An Mak ninen o ru kagin anane la ya. In ansam na ipalu tap, ananep kagin apani wa. ¹¹Agod Jesus, in yanan aenta Jastas dubol dan dam ansam na ilo uyan ru igane ipalu da. Naisag urat kisaek adi a Anut san kagin panek o urat digane dan, lulujad lo tamol utol en mi Juda tamol a. In nai dubunawag go ilog pasai ibol a. ¹²Epafras, in dam ansam tamol kisaek a, agod ilo uyan ru irupaijan da. In Jesus Kristus san urat tamol mok a. Insan gadin lo an ninemi wo urat wagai igane dugo, Anut igo isumiani da: Anut ilon dugo ibol dak alon uyan pe, tinim ntum fidian lo ari apani wa, agod an mel ta ninen o, ta katuk amam na wa, an lo dop ananem ilo rumok Kristus lo yan dabai a. ¹³Nai naiseg jurupaijan da, in an ibinawan o urat wagai igane da, agod ilo rumok adi Laodosia na yan, Hirapolis na yan dam ninedi wo urat wagai igane da. ¹⁴Manjam turama mok, Luk, in a dokta tamol amaiak, Dimas da ansam na ilo uyan ru digane ipalu da. ¹⁵Nai naog ananep ilo uyan ru, ilo rumok adi Laodosia na dumado dan arupidai. Nimfa, agod midaen a insan ab lo dutumani dan dam, naisag ilo uyan ru arupidai.

¹⁶Girek en asutip ale gup murna Laodosia midaen sad na agane yaup, in dam dusuti dop dulong a. Nek ago mi an dam girek taida an Laodosia midaen sad nag ipalu yan asutip ale wa.

¹⁷Akipas arupe, "Tubun ak inanen urat gane wo dipiliano yan urat wagai ganep, gane yau itout a."

¹⁸Nai Pol, naiseg banig mok nam ru wadan en ngigire da. Nai ilo uyan ru jurupaijan da. An nai subanek lo nmado dan, ilom ta inajon na wa. Nai ngudani da, Anut inanen ilo panek an da ka amado wa.